

四經同卷

佛說犢子經

佛說乳光佛經

佛說無垢賢女經

佛說腹中女聽經

佛說犢子經

第十

吳月支優婆塞支謙譯

聞如是一時佛在舍衛國祇桓阿那邠遲阿
藍精舍爾時佛遇風患當須牛乳時有婆羅
門大富去城不遠時佛遣阿難言汝往到婆

第十

羅門家從乞牛乳阿難受教而往到婆羅門
家婆羅門問阿難來何所求阿難言如來向
者小遇風患使我來乞牛乳耳婆羅門言牛
在彼間自擊取之阿難即往到牛所掙牛性
常弊惡無人能近阿難即自思惟我法不應
自擊取牛乳爾時帝釋知阿難所念即來化
作婆羅門像在牛邊立阿難往倩言婆羅門
爲我擊取牛乳婆羅門言諾即前以右手捫
摸牛乳語牛言如來遇小風患汝與乳種今
如來服之差者汝得福無量不可稱計如來

者是天上天下之大師也常以慈心憂念一切蠕動之類欲令度脫一切苦惱牛言此手捫摸我乳一何快耶前兩乳取去置後兩乳用遺我子我子朝來未有所食爾時犢子在邊立住聞有佛名即語母言持我乳分盡用與佛佛者是天上天下之大師也甚難得值我自食草飲水足得活耳何以故我先身以來常飲乳食今作畜生牛身亦復飲乳世間愚癡者甚多無量我先世時坐隨惡知識教不信佛經使我作牛作馬經十六劫而今乃

得聞有佛名持我所食乳分盡用與佛滿器而去令我後世智慧聰明得道如佛阿難持乳還至佛所佛問阿難彼牛母子有何言說阿難言大可怪也牛先甚弊惡不可得近有一婆羅門為我犢乳牛即調善子母共說佛言此牛子母^{牛十}先世之時不信佛經故隨牛馬中經十六劫今乃得悟聞有佛名便有慈心以乳施佛彼牛母子後身當為彌勒佛作沙門弟子得大羅漢犢子死後當為我懸繒幡蓋散華燒香受持經戒過二十劫後當作佛

名乳光如來度脫一切佛言牛以好心善意
與佛乳故度諸苦難得無量福報以是因緣
佛不可不事經不可不讀道不可不學普告
天上天下皆悉令知

佛說犢子經

佛說乳光佛經

西晉三藏法師竺法護譯

聞如是一時佛遊維耶離梵志摩調音樂樹
下與八百比丘眾千菩薩俱國王大臣人民
及諸天龍鬼神共會說經時佛世尊適小中
風當得牛乳爾時維耶離國有梵志名摩耶
利為五萬弟子作師復為國王大臣人民所
敬遇豪富貪嫉不信佛法不喜布施但好異
道常持羅網覆蓋屋上及其中庭欲令飛鳥
不侵家中穀食之故所居處去音樂園不近